

مشروع الحكايا والتاريخ الشفوي

ورشة المعارف

٢٠٢٠

الحكواتية: هالة البزري

السلسلة: النشر البديل

التاريخ: 23/10/2021

رقم الأرشيف: 20-APOH-001

نوع الأرشيف: عام

النشر البديل	السلسلة/الموضوع الرئيسي
20-APOH-001	رقم الأرشيف
عام (لا حاجة لإذن خاص)	نوع الأرشيف
هالة البزري	الحكايات
1967	تاريخ ميلاد الحكايات
23/10/2020	تاريخ ومكان المقابلة
في هذه المقابلة، تشارك هالة البزري قصص من طفولتها في بيت محبٍ للكتاب والقراءة، وعلاقة العائلة بأشجار صنوبر، وعن دراستها ومسيرتها المهنية، مع عملها السابق في مكتبة المدرسة عندما كانت صغيرة، حتى لحظة تأسيس دار الصنوبر مع أخيها وصديقة لهما، ياسمين طعان المصممة. تحكي لنا عن الأسماء الأخرى التي كادت أن تكون بدلاً من "دار الصنوبر"، وعن تعريفها الشخصي للكتاب كمنتج، وتفصيل عملية الإنتاج في الدار، وسنينه الأولى، كما عن وضعه الآن بعد حادثة إنفجار 4 آب، والدعم المعنوي الذي يعرضه المارة عليهم لرغبتهم بأن يبقى الدار موجوداً.	ملخص التاريخ الشفوي
سهيلة شريجي تدرس الأنثروبولوجيا في الجامعة الأميركية في بيروت. تهتم بالنشر وبالإنتاج الاجتماعي والاقتصادي المتمثلين في حالات تشابك وتظافر علاقات القرى مع إشكاليات العمل	معلومات عن الباحثة
زينب الديراني	التفريغ
مكتبة ودار نشر صنوبر بيروت، سنة 67، نشر، كتابة، تصنيع الكتاب، طباعة، بيع الكتب، نقد الكتب، البحث في تاريخ النشر وتاريخ الطباعة في لبنان والعالم العربي، تصنيف الكتب، مكتبة المدرسة، مركز الثقافة الفرنسي، القصص البوليسية، كتب young adult، مجلة نقدية لأدب الأطفال، المكتبة الوطنية، ثورة، مكتبات، دور نشر، موزعين، عصفورية، L'Olivier، شجر الأرز، شجر الصنوبر، حرش بيروت، سنة 2012، سنة 2014، Samuel Beckett، ياسمين طعان، graphic design، جنى طرابلسي، LAU، هيبه دحروج، سارة شاهين، بيت الكتاب الدولي، شريف مجدلاني، مروان بزري، بيروت، سلسلة "إقامات"، سلسلة "روح العيلة"، سلسلة "كارنتينا"، معرض الكتاب العربي، الكتب الإلكترونية، مجلة "بدايات"، الخبر القصير، مكتبة Recto-Verso، كورونا، كيندل [Kindle]، كتب ورقية، مطبعة كاليفراف [Calligraph]، علي جوربة، فصحة، عامية، أفغانستان، باكستان، القاف المهموزة، هوامش الكتاب، كتاب "رسوم، الياس أبو شبكة، كتاب "رسول العلي"، فؤاد حبش، كتاب "غلاء"، تاريخ أدب الأطفال العربي، فهرسة، عين المريسة، 1930، بردل [Bordel]، إنفجار، ستاركو [Starco]، بحر، دولار، رواية، ثقافة بصرية، وزارة الثقافة، ليبيا، العراق، النشر البديل، عمان، مسرد، حياة ثقافية، صحافة، مهى مئمون، وآلاء يونس، فيليبيا دحروج، و جورج حنّا، كتاب "ورق بيروت"، بعد بيروت آرت سنتر [Beirut Art Center]، الأردن، النوستالجيا [nostalgia]، فترة الخمسينات، أوائل الستينات، فترة السبعينات	الكلمات الدلالية

Rights of Ownership for the Storytelling and Oral History Project

The Knowledge Workshop holds full or co-ownership of all items that it archives and publishes. Recordings published on the Knowledge Workshop website can be used only for cultural, educational and non-profit purposes, and never for commercial purposes.

To use the material on our website, including the oral histories and their related images, we ask that you always reference the Knowledge Workshop with: Storyteller's name, interviewed by Researcher's name, Date, The Storytelling and Oral History Project, the Knowledge Workshop, Beirut, Lebanon, page number. [Ex. Nazik Saba Yared, interviewed by Deema Kaedbey, 2017, The Storytelling and Oral History Project, the Knowledge Workshop, Beirut, Lebanon, pp 12.]

To use the limited-use items held within the Knowledge Workshop, you can visit our office in Furn El Chebbak and fill out a permission form. You can use these items inside the Knowledge Workshop space, but we request that you consult with us on which items you can use. Some of these items require permission from the storytellers before being used.

حقوق ملكية لمشروع الحكايا والتاريخ الشفوي

لورشة المعارف ملكية تامة أو مشتركة للمواد التي تؤرشفها وتنشرها. التاريخ الشفوي المنشور على الصفحة الالكترونية لورشة المعارف يمكن استعمالها فقط لأهداف ثقافية وتثقيفية لا تبغى الربح، ولا يمكن استعمالها لأهداف تجارية تبغى الربح.

لاستعمال المواد على صفحتنا الالكترونية، من ضمنها التاريخ الشفوي والصور المرافقة نطلب منكم التنويه بورشة المعارف كمرجع باستعمال: اسم الحكواتية، قابلتها اسم الباحثة، السنة، مشروع الحكايا والتاريخ الشفوي، ورشة المعارف، بيروت، لبنان، الصفحة. [مثلاً: نازك سابا يارد، قابلتها ديمة قائدبيه، ٢٠١٧، مشروع الحكايا والتاريخ الشفوي، ورشة المعارف، بيروت، لبنان، ص. ١٢]

لاستعمال المواد المحددة الاستعمال الموجودة في ورشة المعارف (الغير متاحة على صفحتنا)، يمكنكم القدوم الى مكتبنا في فرن الشباك وتعبئة استمارة الطلب. بالإمكان استعمال هذه الموارد داخل ورشة المعارف، لكن نسألكم ان تستشيرونا عن أي مواد يمكن استعمالها. بعض هذه المواد تتطلب طلب من الحكواتيات قبل استعمالها.

شربجي: اليوم التاريخ 2020/10/23، أنا سهيلة شربجي، و اليوم عم قابل هالة البزري، بمكتبة دار الصنوبر ببيروت، بشارع مونو، ومرحبا هالة [تضحك]

هالة البزري: [00:00:22] أهلا فيكي

س.ش.: حابة بلش أول شي بتاريخ و مكان ولادتك

هالة البزري: [00:00:29] ممم ببيروت، 67

س.ش.: ممم، و بشكل، بشكل، أو بشكل مباشر، كيف بتعرّفي عن عمك هلق، الشغل يلي بتعمليه؟

ه.ب.: [00:00:44] بشتغل بمجالات الكتاب، ممم، كل النواحي، نواحي تصنيع الكتاب، نواحي الكتابة، نواحي النشر، ممم، عندي حشرية على الطباعة، و كمان، ممم، ببيع الكتاب، و بنقد الكتاب، كل هالأشيا بحب أعملها

س.ش.: [تضحك] ممم، إيه، حابة أسأل كيف بتعرّفي عن حالك خارج الإطار، خارج إطار العمل؟

ه.ب.: [00:01:13] هلق الشقيقة الثانية، هي، يلي ما ذكرتها كثير، هلق هي أنو أنا يمكن أكثر شغلة بتعني لي شخصيا بشغلي هي ال، ناحية البحث، البحث بتاريخ النشر، تاريخ الطباعة، بلبنان، بس كمان بالعالم العربي، بصورة عامة، بهمني الموضوع، برات هول يعني، بحياتي العادية يعني، شوي عكس السير، بعرف عن حالي، يعني، إذا بدّي عرّف عن حالي، بس إنو بصورة عامة، ما كثير بجرب عرّف عن حالي، إنو [تضحك]

س.ش.: [تضحك] ممم أوكيه، هلق أنا ح بلش بهالسؤال، بس ما بعرف إذا إنت بتحبي تخبري قصة منشورات صنوبر ببيروت بطريقة ثانية، فحابة إسأل، شو هي الأحداث و الخيارات يلي وصلتك للنشر، أو للشغل مع الكتاب بشكل عام؟

ه.ب.: [02:14] ليكي، حقيقة، إذا بدّي إرجع للبداية، هي القراية كنت حب إقرا كثير، هلق، من أنا وصغيرة عندي، هواية، ممم، تصنيف الكتب، يعني كان بالبيت، كتب خيي، كتب بيبي، هيك، كلايتهن حطلهن أتيكيتات، يصيرو الكتب بالبيت كلهن ينتظموا، لأن أنا بدّي أعمل هالشي، كان عمري 13-14 سنة، حط فيش بكل كتاب، هيدا منقدر نعيرو، هيدا ما منعيرو، هيك شي، بلشت هيدي الشغلة، يمكن من مكتبة المدرسة، ممم، حتى قلدهن يعني، و بعدين بالصدفة اشتغلت بمكتبة المركز الثقافة الفرنسي، مكتبة إعارة قصص فرنسية و ال—أوكيه، ممم، أول، يعني، أجت فترة علمت، إشتغلت بمركز الثقافة الفرنسي، بالمكتبة، لأنو كنت حب إقرا كثير يعني، و ما كنت بعرف شو هو هالشغل بالطبيط، ف إفتكرت حالي رح إتوظف تصير إقرا كل الوقت، يعني، و بعدين عملت دورات، و هيك تعلمت، تعلمتها كمهنة يعني، وكان بهالفترة أكثر شي يحرصني أنو يكون، ممم، أول شي، لازم يكونوا بالفرنسي الكتب، ما في عربي، ممم، بالوقت اللي كثير ناس بيسألوني كانوا عكتب عربي، و ثاني شي إنو إتطلع بهالكتب الفرنسي، يلي، إنو، من أنا و صغيرة بقرا فرنسواي أكثر من ما بقرا عربي، لأنو ما بلاقي الكتب اللي، ممم، بتفشلي خلقي، يعني، مثلاً، بحب القصص البوليسية، ما بلاقي كثير بالعربي بحب ال، أنواع قصص ما، ما عم لاقيةها، و بالأخص لما بتكوني بعمر، بأكثر فترة فقدتهن هي بالعمر اللي هو مرهقة يعني من بعد ما خلصت مثلاً تنقول من الشياطين 13، أو من-- و بعد ما صرت بعمر بقدر إقرا قصص للكبار، هيدي العمر، بإيامي أنا ما كان في كثير، حتى هلق قليل، ال يونغ أدلت [young adult] يعني، قليل ما يكون، ما تلاقيهن كتب، فصرت، أول فترة، صرت أحلم إنو بدّي أعمل أنا كتب للولاد بالعربي، ممم، وحدة صاحبتني بتقلي "قيل ما عملي كتب للولاد بالعربي، شوفي شو في بالسوق"، عطنتي هالفكرة، فمع صحابي، عملنا مجلة نقدية لأدب الأطفال، أنو نشوف شو في، شو بيطلع كتب للولاد، نتعرف على هالمجال بدل ما دغري نجي نحن نطلع كتب، هلق أنا كنت مشروع عي هو كتب للكبار، بس حطيت براسي إنو لازم نبليش مع الصغار، اشتغلت فترة بنقد كتب الأطفال و بنفس الوقت، كنت أشتغل صرت بالمكتبة الوطنية، ممم، و كنت عم حضر الدكتوراه بتبعيتي، يلي هبي عن تاريخ النشر، بعدين شلت من راسي تدريجياً الأولاد، فإشتغلنا هالكم سنة، يعني، على نقد أدب الأطفال، بس لما أنا بين المكتبة الوطنية، و بين أطروحتي، فخلص عم ببعده شوي عن أدب الأطفال، بيرجع تركيزي للكتاب بشكل عام، ممم، هلق بعدين، كيف صار إنني عملت دار نشر؟، صار إنو فعلياً كان عندي من زمان مشروع، إنو لما بصير على التقاعد بدّي إفتح دار نشر، كان هيك مثل إنو بدّي أعمل هواية بس أوصل للتقاعد، لما اشتغلت كذا سنة عم اشتغل على أطروحتي على شو بيعمل، كيف بيشتغل، إنو الناشرين، صار، بتعرفي، بتصيري بتتقدي، هيك بتصيري عندك نظرة، إنو بي، عملوا هيك ما-- بالأخر انتبهت، إنو عشو عم بتتقد؟، ما أنا مني على الأرض، إنو، ما بعرف شو عم يعملوا بالطبيط، يعني، ما بعرف شو الواقع تبع الشغل قبل ما أجي قول كان لازم يعملوا كذا، ليه ما عملوا هيك، ممم، فصار شغلتي بنفس الوقت، من جهة صار إنو أنا عندي حشرية إنني

أعرف عنجد شو بصير، نيكون عندي نظرة شاملة أكثر، ومن جهة ثانية، ساقبت خيي، ممم، شاغل عكتب، وعباله ينشر هن، و عباله، يعني، جرب يحكي مع عدة ناشرين، و حب إنو أنا أعملهن، فصار في مشروعه إلو، و مع فكرة شو لازم أنا مستعد، و شغلي إلي، و نحن، أنا و إخواني، كثير قراب من تفكير بعض، شو بدنا بالنهاية يكون الشغل، أنا و إختي و خيي، فسوا قمنا بهالشي، على الأرض أنا، يعني، أكثر شي، و صار دار النشر، هلق، صار دار النشر بتكتشفي معها، بعدين، كيف بتعملي كتب، بعدين بتكتشفي إنو، ممم، هالكتب، ممم، طبعناهن، و بعدين كيف، شو بدنا نعمل فيهن؟ ممم، أنا ما يعرف كثير إني صر على بيعهن، تعاقبت مع حدا مشان التوزيع، ما كانت تظبط معه، التوزيع منيح و هيك، ممم، فساقبت من جهة أخذنا هالمكان، أسأجرناه لأسباب إدارية يعني، و من جهة ثانية إنو، ثورة و ما ثورة سنة الماضي، فإنو أوكيه، ثورة، المكتبات عم تسكر، هات تفتح مكتبة، هيك صارت يعني، بالضحك و المزح، إنو أوكيه، مش، مش ضحك و مزح هو، عنجد كان، بس إنو، طب هات ت جرب أنا بيع كتبي، و دغري، فكرة هات تجرب بيع كتب صحابي يلي هني دور نشر صغار، و بعدين صار إنو أوكيه، صار يجي عالم صار ما فيني إكتفي بكذا، بدي وسع أكثر فصرت جيب، شكل، ممم دور نشر صغيرة و أكبر شوي، بس بعدنا على إطار بيت صغير، يعني إطار ضيق، مش ما بحياتا رح تصير مكتبة كبيرة ضخمة، رح يضل هالمكان الممكن شوي، هيك.

س.ش.: [تضحك] ايه فشو رأيك نرجع شوي على إسم الدار؟

ه.ب.: [00:08:55] ممم، أيه، بالأول كان لازم تكون إسمها عصفورية، مشروع كان، بتعرفي العصفورية، ايه، كان المفترض يكون إسمها عصفورية، عأساس أنو نحن عايشين بعصفورية هون، ممم، بعدين، ممم، ما، يعني، لما بتجي بك تبلشي، و بتقولي بدي سمي دار النشر عصفورية، مش جد، إنو بعدين، متعب إنك تحملي الإسم و تدافعي عنه دائماً، بك شي بيمرق بسهولة أكثر. كان في، في دار نشر فرنسوية بحب لوغو تبعها، بحب شكله، و هيك، إسمها لولوفي [L'olivier] الزيتون، صرت حس إنو الزيتون، أنا بحد ذاتي، إنو الزيتون بتعني كثير، بس ما، مش شخصياً بتعني، اللي بيعني أكثر، و الأرزة بحبها كثير، بس ما يعتبرها إلهة علاقة شخصي معي، إنو أنا ربيت بالصنوبر، اللي بيعني هو شجر صنوبر، فصار إسمها صنوبر بيروت، و في هالتقليد القديم ببيروت، إنو بينشروا العالم عصنوبر بيروت، يعني بيروحوا بيقعدوا بحرش بيروت و بيحكوا، ببسعيوا العالم، و بيحكوا عليهم، فلانة شهرت مع فلان، و هيدا عم بخون مرته، و ما يعرف شو، فإنو منتشر، بقولها تنتشري الواحد عصنوبر بيروت، يعني مثل نشر الغسيل، و هيك، قلت منشتر شي ثاني

س.ش.: [تضحك] ممم، أوكيه، فقلتيلي أنو هي الفكرة خلقت بينك و بين إخوانك و بعدين كبرت هيك، و بعدين صرتي تشتغلي كمان مع رفقاتك اللي عندن كمان دور نشر صغيرة، و هيك، فبتحبي تزدي شي عن إنو، إنو شو البينة يلي خلقت فيها الدار؟

ه.ب.: [00:10:45] ممم، ليكي، هي بالنهاية من--، فلتلك من أنا و صغيرة، بحب هالشي، ممم، و، ال، كان، كان عندي، وقت ما حطيت مشروع إنو على التقاعد بدي أعمل دار نشر، ما كان فكرة دار نشر، بس كان فكرة، حتى، إنو بدو، بدي صير غنية كثير، و يصير عندي بناية قديمة، 3 طوابق، فيها قهوة/مطعم، اللي هو العصفورية، فيها مكتبة بيع، فيها دار نشر، و فيها مركز دراسات، إنو كنت عم شوف الإشي هيك، إنو عم بخوتها ما أكثر من هيك، فالمشروع كاي من أساسه، أنو، حلم مش أكثر، بس بنفس الوقت، أساس الحلم هو البينة بالبيت، يلي هي، أمي و ببي و حبهن للكتاب و قديه كانو، ممم، إنو كان في هالفكرة، إنو شو ما بدنا كتب نحصل عليه، مش شو ما بدنا ثياب نحصل عليه، ولا شو ما بدنا، ما كان يهمننا الموضوع، كلايتنا بالبيت بهمننا الكتب، فهالكتاب المتوفر عنا كثير، و في منه بكمية، و منحه، ما حدا فينا تخايل رح يقدر يعيش بغير جو، إنو هيدا هو الجو يلي من نحن و صغار عايشين فيه، و يلي طلقنا، منتفوسا، ف طبيعي، ممم، يعني، هلق، كان ممكن ما يصير اللي عملناه، بس كمان طبيعي أنو يكون صار، عرفتي؟، إنو كان ممكن نتجه عشي معاكس تماماً، بس هيدا اللي حبيننا نعمله

س.ش.: [تضحك] كثير حلو ممم سو [so] و هي الدار بأي سنة تأسست، أسستها؟

ه.ب.: [00:12:32] سنة ال، رسمياً سنة الأول ل 14 يعني نحن من نص ال 13 و نحن عم نحضر فيها، و عم نحضر بالكتب، نحن و عم نحضرها إدارياً، 2014 أولها، سجلناها، و ب، ممم، بخريف ال 2014، يعني على معرض الكتاب العربي كانو جاهزين أول 5 كتب. ما بعتمد فينا نقول "أسستها"-- مش ما بعتمد، أكيد ما فينا نقول "أسستها"، نحن، إنو، مجموعة، يعني، وقت ما بلشنا، أنا كان براسي هيدي، فكرة النشر بدنا تصير لأطلع عالتقاعد يعني، و خيي كان عنده هالكتب-- هالنصوص يلي شاغل عليها، مترجمها، و حابب ينشرها، يلي هي نصوص "بيكيت" [Samuel Beckett] فهو بدو إنو أنا أهتمله-- فليش بدني خليا لبعدين؟، خيي قال لي "يعني إنو ما زال هيك هيك بك تعملي دار نشر، شو بدك؟، دعم مادّي، دعم معنوي، شو بدك؟، أنا هون، بس أعملها هلق"، و هيك صار، فهو مسك كل ش--، يعني أنا مسكت الشغل العملي من الأساس و هو كان أول شي الدعم الماديّ كلّه متو، بعدين كان-- حتى ال-- كلّ التفكير فكرناه سوا، هلق كيف بدنا نعمل الكتب من الناحية العمليّة؟، هيدي صارت-- صار شغل-- نحن بلشنا أنا وياه،

دغري فانتت معنا ياسمين طعان، صاحبتنا يلى هيى ديزاينر [designer] ممم، غرافيك ديزاينر [graphic designer] وأستاذة ديزاين [design] بالLAU وهيك، لما بلشنا بدنا نحكي عملياً كيف شكل الكتب، اشتغلنا من أول الطريق مع جنى طرابلسي، يلى هيى لليوم الديزاينر تبعيت "صنوبر بيروت" يلى هيى أسست الدار معنا، وكل الشى يلى هو بصري ب"صنوبر بيروت" كان شغلها، يعني حتى لما مثلاً حدا عم بنفذ غيرها، أو حدا ديزاينر [designer] غيرها عم يشتغل--، مش تنفيذ، كمان مثل هلق في هيبة دحروج عم تشتغل معنا، مش-- منها عم بتفد، عم تشتغل، عم تعطي هيى الشغل، بس تحت إشراف التنسيق العام للأخراج الشغل هو جنى، لحتالي نضلنا على نفس الموجة كشل دايماً، وكمان من الناحية اللغوية اشتغلنا مع عدة أشخاص بس أكثر شخص مستميرين معه للتصليح ومراجعة النصوص هو-- هي سارة شاهين يلى بعدنا لهلق عم تشتغل معها ويلى هيى كمان كل شي بالتفكير، كيف منكتب هي--، منقعد منتحدث كلنا سوا يعني، تنقاية الأشياء اللي بتتعلق بكتابة العامية، القرارات اللي منتبعا لتوحيد كيف منعمل تنقيح النصوص، تصحيحها لغوياً، دايماً بتصير معها، فإذا هيى: مروان، ياسمين، جنى، سارة-- هلق ياسمين أقل-- اضطرت تنسحب لما ما عادت تقدر إنها تكمل شغل معنا بسبب وقتها. و--، وبعدين في--، في مؤسسات اشتغلنا معهن مثل--، أهم شي--، يعني أكثر حدا اشتغلنا معه هيى "بيت الكتاب الدولي"، ممم، "بيت الكتاب الدولي في بيروت" إسمهن الرسمى إذا منى غلطانة، اللي هيى الجمعية اللي أسسها شريف مجدلاني واصحابه، شريف مجدلاني الرواني يلى بيكتب بالفرنسي، أو يلى هيى جمعية بتهمم بانها--، تسي--، يعني بتجيب--، ممم، بتعزم--، بتدعي روائيين أو فلاسفة أو شعراء على بيروت تيكتبوا عن بيروت، فمن هيى سلسلة "إقامات" عملناها معهن، طلعنا كتابين لحديت هلق بهالسلسلة: "روح العيلة" و"كارانتينا"، وبدنا نكمل، إنو بس هلق كل شي واقف وجامد بلبنان، بس بدنا نكمل لاحقاً يعني. ممم، فهيك فينا نحكي عن تأسيس، مش أنا، هالة، أسستها، مع إنو أنا اللي عم ديرها وعم نسق الشغل كلياته فيها، بس كلياتنا عم نشغل سوا فيها يعني، و-- يعني أنا بالواجهة بس منى لو حدي فعلياً، بالمرة. هلق أيمننا بلشنا؟ رسمياً بلشنا ببداية سنة ال14، 2014، [00:17:32] يعني نحن من نص ال13، ونحن عم نحضر بهالمشروع، عم نحضر بالكتب، وعم نحضر إدارياً منشورات صنوبر بيروت، وبأول، ببداية 2014 سجلناها، وبخريف 2014، يعني بوقت معرض الكتاب العربي، كانوا جاهزين أول 5 كتب

س.ش.: ممم، وب، إنو بتفكري بالأول كم سنة كانوا مختلفين عن هلق، السنوات اللي هلق عم تمر فيهن الدار؟ ولا؟

ه.ب.: [00:18:04] مش بسبب الدار، بسبب لبنان! بسبب الأوضاع حولينا، ما فيكي تنسلي عنها، يعني، بالنهاية هلق ما بقى عنا معرض كتاب يعني، بهالسنوات الأخيرة معرض الكتاب العربي تبع بيروت [ينقطع التسجيل ويواصل] إيه، كنت عم فلك إنو من معرض الكتاب العربي ب--، يعني أساساً صغر كثير، ممم، وضع الكتاب بال--، ب--، بالعالم بيقلو إنو صار يتراجع مقابل الكتاب الإلكتروني، هلق بالواقع، هون، بالعالم مش مزبوط، مش مزبوط لهالدرجة يعني، ممم، ما في، ما في هالقد، قشوط، قشطة قوية للكتاب، ما ضعف مثل ما ضعف نحن عنا نحن هون، نحن ضعف الكتاب لأنو أساساً القراية بحد ذاتها--، إنو أنا إنطباعي، مش عم فلك شي عن دراسة أو--، بس إنطباعي إنو القراية اللي فيها تركيز، يلى بتستمر، هي اللي أكثر شي خسرت، و هيدي هي قراية الكتاب، ممم، العالم صارت تقرا أكثر الأشياء القصيرة، و مش بس سببه، سببه السليولير [cellular] و هيى أشياء، بس كمان سببه الفلق، ما عندك أي أطمأنان على إنت شو البعد شوي تبك، ف، فهالفلق بيتناسب منيح مع راية الخبر الصغير، أو المراجع القصيرة، عم يكتفوا فيها العالم صارو، ممم، بنفس الوقت أنا مع المكتبة هون عم لاحظ إنو منو، ما فيكي تعممي هالقد، بيحي مرات ناس عنجد بدهن رواية، بدهن يها شوي طويلة، بيطلبوها، بدهن ياخذوا وقتهن بالرواية، و يغرقوا فيها و، بعدو موجود هالشي، عرفتي؟، في ناس مثلاً، هالمجلة "بدايات"، موجودة إلكترونياً، بدهن يها ورقية، ليقدروا يقرأو بدون ما يقطشون شي، فيبعد عندك من كل الأشكال، و، يعني، مثل ما عم فلك، الوضع اللي تغير عام و مش بخص أنا شغلي كيف عم بكون، ممم، و هيى

س.ش.: ممم، أو كيه، حابة إرجع شوي عالمكتبة كمساحة هون، فحابة إسالك إذا في شي ذكرايات بتحببها هون أو أشياء مثلاً بتضل تخطرلك، متعلقة بالمحل، بهالمحل اللي هون

ه.ب.: [00:20:50] لا، هيدا المحل بعدو جديد، هلق إذا بدك، قبل ما يكون مكتبة صنوبر بيروت، كان مكتبة ركتوفيرسو [Recto-Verso]، يعني بعدو براسي إنو كاين مكتبة قبل، كاين مكتبة بتبيع كتب فنية، كان مكتبة بيع، و مكتبة مراجع، كتب فنية، بس بتتعلق بالفنانين، و حتى أنا هلق عم بيع كتب هالمكتبة القديمة، يعني، عارضة كتبهن، يلى هي بتحكي عن فنانين لبنانية بال، القدام و المعاصرين كمان، بس إنو فلك إنو، يعني، بهلق السنة هاي اللي مرقت علينا كانت ممم، مشحونة، مشحونة إنو نحن عطريق ال، الثورة و عطريق المظاهرات و عطريق، نحن عالرئغ بالنهاية، يعني، بتضهري، بتسمعي من هون هدير العالم هي و ماشيين، سنة الماضي، لحد، لحد كورونا يعني، لحد، لحد أذار، ممم، ف، إنطباع، الشى الثاني يلى هيى، ممم، كان يعني، ممم، بيبقى براسي لبعدين، رح يكون، بس هو بعده طازة هلق، هو هالشي اللي صار بعد الانفجار، سكرنا شهر نحن أكيد، تقريباً يعني، أب كلّه، لآخر أب، ممم، كنت هون مرة، ما كنت فاتحة عنجد، بس إنو شوي، فيفوت حدا، ساقبت بظرف إسبو عين تقريباً، كل ما حدا يفوت يكون

عندو هالجملة "راسي مش جامع إقرا بس بدي إشتري كتب من عندك تضلك، إنو تضايينوا، رح باخدن، بقرهن بعدين، هلق ما في إقرا شي"، هالردة فعل، إيه، من الشئ اللي بيبيقي لألي بعدين

س.ش.: ممم، أوكيه، هلق حابة إنتقل شوي، حابة إسألك، و هيدا السؤال من زمان كثير حابة إسألك ياه، إنو كيف إنت كناشرة بتعزفي الكتاب كمنتج، وكيف بتعزفي عملية إنتاج الكتاب، إنو كيف منطلع كتاب؟

ه.ب.: [00:23:07] شو قصدك كيف بعزف، كيف بعزف الكتاب، كيف يعني؟

س.ش.: إنو، مثلاً هو سؤال ممكن يكون غريب شوي، بس إنو في عالم الكتاب بالنسبة إلهن هو النص، في عالم الكتاب بالنسبة إبن هو الورق

ه.ب.: [00:23:19] ممم، ممم، ممم، أوكيه فهمت عليكي

س.ش.: فحابة أعرف إنطباعك

ه.ب.: [00:23:25] أيه، ليكي أنا الكتاب، طول عمري بحب ريحته، ولمسه، بغض النظر عن محتواه، ممم، وبحب الذكريات اللي بتصير بتخلق مع الصفحات لما الكتاب قرينيه، منشان هيك ما كثير بحب إستعير كتاب، يعني، مثلاً، إذا إستعرت كتاب من مكتبة، أو من حدا من صحابي، بمجرد مرقوا 10 صفحات و حبيت الكتاب، بوقف، بشتره تيبقى عندي، لحتيلي ما إقرا نسخة مش رح تبقيني عندي، مثل كأنو عم يتسجلوا بالورق ذكرياتي و إنطباعاتي يعني، ممم، لما بلشنا دار النشر، أكثر كان، كان بلش فكرة إنو الكتاب عم ب، بيتنقل، كان في، عم ينتقل من مرحلة لمرحلة، يعني مثل إيام ما السينما عم تنتقل-- التليفزيون، في علامات سؤال مهمة كانت على هالمرحلة متقدمة، إنتقال كتاب لل، للكيندل [Kindle]، ولل--، فكنت، كان كثير مهم فكرة إنو ليش كتاب ورقي؟، وقت ما نحن بدنا نطلع الكتاب، هلق ليش نحن بدنا نطلع كتب ورقي؟، خلص أنا بالنسبة لألي الجواب واضح، لو ما حدا بدو ياه، أنا بدي ياه، بحبه، هيك بحبه، ويعرف إنو في ناس مثلنا، إنو، هيدول عقلا تهن، بحبو يقرأوا كتاب ورقي، بس لما بدك ت، لما بدك تفلسفي الفكرة، أو لما بدك تلاقيلها مبررات، تعطيلها حدا غيرك، و تعطيلها لحالك حتى إقتصادياً يعني، دراسة جدوى، كان في فكرة إنو، ممم، بالأخص نحن منعمل كتب يا أما أدبية، يا أما ممم، صورية--، تصويرية يعني، ال، ال، ش--، مش إنو مثلاً مراجع، بشكل إنو بدك تشوفي معلومة، بدك تتأكد من شغلة و تسكريه، لأ، ممم، النص بيدعيكي لإنك تعمليله قراية من بدايته لأخره، مش قراية متقطعة، فكانت فكرة إنو يكون، ممم، في شغل على، عليه كقطعة، مش ك--، يعني شغل فني إذا بدك، مشان هيك أول شغلة كانت، أول خطوة، يلي هي بلشت مع اللوغو [Logo]، كيف بتعملي اللوغو تبعك، كانت إنو منشغل مع حدا فنان، و منحب شغله فنياً، إيه ف، فاتصلت بجني طرابلسي، اللي كنت بعرفها، بس بعرف هل، يعني، معرفة مش كثير قوية، و سألتها إذا بتعملنا اللوغو، و قعدنا تحدثنا، و عرفنا إنو، أول شي، إنو بدنا نشغل مع بعض عطول، و تاني شي إنو هي مش قصة لوغو، هي قصة هوية، فبدها تقوت معنا بإنها تخلق الهوية، و هيدا اللي صار، خلقت الهوية من اللوغو، ل وين يبجي، أكيد، كل التصرفات باللوغو، لأي نوع من الألوان منستعمل، مم بالغلاف، شكل الغلاف، ممم، الورق، إذا ال، مثلاً، الكتاب مخيط، يمكن هيدي أنا أكثر منها هي تيسر عليها، أنا ما بحب الكتاب الملزق، بدي ياه مخيط، بحب فكرة إنك تخيطي الورق و هيك، و كانت مكلفة، يعني، و كان فيها لبكة، يعني، و بعدين أي مطبعة؟، يعني، مثلاً أنا فنشت، برمت على مطابع و هيك، و في حدا إرتحتله كثير، يلي هو مطبعة كاليغراف [Calligraph]، علي جوربة، إرتحتله لأنه، لأنه كمان فنان، يعني هو خطاط بالأساس، و هو بيهوا الكتاب، و بيهوا الورق، فصفينا جمعنا مع بعض نحن كلياتنا ناس منحب ال، هالمنتج، مم إنو يكون عنا، مش إنو عم نطلع كتاب و بدنا ننشره و نبيعه، يعني كل كتاب معه قصة بده يكون، قصة الكتاب و قصتنا معه، و هيك اشتغلنا، هيدا من ناحية شو هو الكتاب، إنو، تعريف طويل، بس إنو، هيدا تعريف للكتاب، هو علاقتي معه

س.ش.: ممم، في شي كثير لفتني بالكتب يلي شفتها، هو كيف بتستعملوا مساحة الهامش، و إنو أحياناً بتكون كثير كبيرة، و أحياناً بتكون صغيرة، و بتكون جزء من شكل الصفحة، ف، ممم، إذا فيكي تحكي لي شوي عن إنو كيف بتفكري، إنو شو بدنا نحط عصفحة، و كيف بدنا نوزعها

ه.ب.: [00:28:19] ليكي مثلاً هلق، في عنا كتابين من سلسلة إقامات، "روح العيلة" و "كرنتينا"، أول ما طلع "كرنتينا"، صاروا العالم يقولولي "بي مطبوع غلط، النص طالع برات ال--"، شو بدي قول إنو، هلق لي بيفهم، مش لي بيفهم بالديزاين [design]، اللي هني ديزاينرز [designers] عرفوا إنو هيدا ديزاين، اللي هني بدهن النص تيقروه ال--، عم بحكيكي عن الغلاف، هي على الغلاف، بتلاقي إنو النص مقطوش، لما صار في روح العيلة، و روح العيلة كمان نفس--، بطل حدا يعلق، إنو عرفوا إنو هيدا هو

هيك، ممم، الشغل على هوامش كل كتاب، ممم، كل كتاب قصته م-مع، عرفتي؟، ممم، نحن أول كتب اشتغلنا عليهم، اشتغلنا يمكن حتى على الخطوط أكثر من ما اشتغلنا على الهوامش بأول كتب، ممم، كثير اشتغلنا على الخط و على هوية الخط، وشو بدنا يعكس، لأن نحن كنا عم نشغل كمان كتب فصحة و عامية، فلما بدك تكتبي عامية، كان--، كان هو، هول الكتب أول خ-أول 4 تبعول Beckett ترجمة خبي، فكان عنده إشيا بالعامية، و كان بده إنو يبين كثير واضح الفرق للقارئ، أول ما بطلع، يعرف إيمتي عم ينتقل من الفصحة للعامية، كان لقاها مهمة بوقت، بدو ياها تبين، مم، فنحن لقينا إنو لما تكوني عم عملي، ممم، فصحة، لما يكون نص فصحة، هو بالأحرى نقي، بكون كلياته محرك، تحريك كامل، يعني إبتداءً من همزة الوصل، موجودة همزة الوصل على الألف، ممم، ل التتوين، مثلاً، أو الحركة، حتى لو في نقطة بأخر الكلمة، كله محرك، ممم بينما العامية، تحريكها إلو شروط، هو بعض الحروف اللي ممكن تضيع، وبعدين دخلناها إشيا إضافية، مثل الشئ اللي منسميه نحن القاف المهموزة، يلي هي حرف القاف، بس إذا بدكتقولي "قاه" أو "أ"، يكون عندك هالامكانية، فعلى ال"ق" بدل النقطين، عندك الهمزة، و هيدي إنو تتركبها أخذنا من أحرف العربية اللي بيستعملوها ب، أفغانستان، باكستان، يعني، الأردن، ما يعرف شو هالقصص، يلي هي بتتقبل إنك الهمزة تحطبيها على "ط"، على الشئ، لما يعرف، عدة مطارح ال، إذا بدنا نرجع للهوامش، ممم، يمكن اشتغلناهن كثير على كتاب "رسوم"، تبع الياس أبو شبكة، ممم، بمعنى هون مش هوامش، داير من دار النص، هوامش بأخر الكتاب كانت، ممم، هيدا كان بقى صفينا بطلنا بالشكل، صرنا بالمحتوى، يعني، كان في، ممم، عملية دراسة، ممم، تحقيق، لنص الياس أبو شبكة، و التحقيق بتترتب عليه إنو تحطي هوامش، بس هالهامش ما لازم تأثر عليك إنت و عم تقرا--تقري بشكل مباشر، لأنها، ممم، مش هو حاطتها، مش الياس أبو شبكة، فحطيناها بالأخر، و عملنا، ممم، الصفحات يكون دايرهن أسود، حتى تقدري تلاقيهن دغري، أنت و عم، ممم، شو بعد بدك قل؟

س.ش.: في شي منشور معين بتحبي دغري ت، تحكي عنه بس حدا يسألك "شو الكتب لي نشرتها؟"، إنو شي بتحبي تبليشي فيه عطل؟

ه.ب.: [00:32:18] ممم، ليكي هو، هو هيدا كتاب الياس أبو شبكة اللي عم قلك عنه، هلق أنا، أكثر واحد مغرومة فيه هو "رسول العلي" لأنو، لأنو الكاتب، يلي هو كايين ناشر، فؤاد حبيش، هو كان واحد من أكثر الأشخاص براسي وقت ما أنا عم أسس صنوبر بيروت، وقت، يعني، هو شخص بحبه كثير، و اشتغلت عليه كثير، و يعني، كتبت عنه، و بيعنيلي، ممم الياس أبو شبكة كان صديقه، ممم، ال--الكتاب تبع الياس أبو شبكة بحبه، مش يعني، بحبه، قصدي، بيعنيلي بشكل أكثر، مش أكثر، بشكل مختلف، لأنو تطلب، ممم، بحث بين، ن--ن--نوعين من النصوص كتبهن الياس أبو شبكة، كان في بقلبهن عدة فوخ-- جمع فوخ ففوخ؟، ما يعرف--، من نوع إذا، إذا ال--، هيدا خطأ مقصود، ولا هو شي ما منعرف فيه نحن؟، و دايماً بيطلع خطأ مش مقصود قصدي، خطأ مش مقصود، يعني خطأ طباعي، خطأ، ولا شي ما منعرف فيه، و دايماً بيطلع مع أبو شبكة شي ما منعرف فيه، ما عنده، كأنو ما عنده خطأ ب، يعني حتى بهالإشيا القديمة يلي كان دايماً في أخطاء طباعة، صعبة إنك ترجعي فيها لورا، إنو، معه هو ما كان في هالشئ، كان، كان كله إشيا نادرة، ما بتعرفها، فإيه كان في لذة رهيبه بانك تكتشي اللغة بهالغنى، ممم، وبهالحدية خيار الكلمات و، يعني، في هيك، في عبقرية، بحس، بطريقة كتابته، و هالشئ ما كنت متوقعته، لأن نحن كل شي منعرفه عن الياس أبو شبكة هو "غلاء" و غراماته، و ما يعرف شو، غرامياته، فيكتشف هالناحية النقدية اللاذعة، بالأخص إنو هالكتاب عملنا إعادة نشر، لأنه مش موجود، ف، ما كان في غير نسخة وحدة مهريه، يعني، أنا برمت عليه الدن، ي ما عم لاقيه، بعدني لهلق إذا بلاقيه النسخة الأصلية بتمنى إنو إحصل عليها، بالوقت اللي هو بيقعد بخبر أديه كان-- أديه تعذب تبيبعه، إنو ما كان يبيع معه، ف، ما يعرف يمكن تلفهن للنسخ

س.ش.: [تضحك] واو، ممم، أوكيه، ممم، إيه، كنت رح أسألك إنو شو أكثر شي بتحبيه بعملية النشر، أو أكثر مرحلة إنو، بتطلعي لإلها، ف، بس حسيت شوي مثل ما قلت، إنو البحث، و إنو، تشوفي شو معقول يكون في أغاز بالنص يلي عم تشتغلي عليه، ف؟

ه.ب.: [00:35:15] ما بالضروري، لأنو مش دايماً هالشئ متوفر بالكتاب، ممم، فعلياً كل المراحل بحبها، مم بحب المراحل، مبارح كنت عم بحكي مع حدا، عنده مشروع كتاب، يعني بعدنا بالصف، يعني بعد ما، ما بلشوا يكتبوا شي من هالكتاب، فكان جايبين يحكوني بانو، "شو ممكن برأيك هالأفكار اللي عنا ياها، تتحول لكتاب؟" فهاللمحة اللي عم تخلق فيها الفكرة، و بعد ما في شي نحن--، أكيد أنا عارفة إنني عم بحكي مع حدا رح يعمل هالشغل و في إلو بال--، يعني مش إنو من الصفر ميلشين، بس ال، ال-- في لحظة اللي عم تخلق ال، عم يخلق الشكل تبع هالكتاب، هيدي كثير حلوة، و أنا كثير بحب قضي وقت على مراجعة النص، إنو فنش عالغلاط، صحح، ساوي، هيك، بحب هالشئ كثير، مع إنني مني هيدي البارعة لغوياً يعني، بشوف الغلط مرات ما يعرف صلحه، فعندي مين يصلح لغوياً، ممم، صبيبة كمان، هيك، مغرومة باللغة، إسمها سارة شاهين، هي اللي بتصححنا، ممم، نصوصنا، ف، أنا بعمل الشئ اللي مبدئياً أنا حابة و مرتاحة، هيك، بلاقيه خلص صار بيشبه الشئ النهائي اللي نحن بدنا ياه، و بيعتلها ياه تتصلحوا لغوياً، ممم، هيدا عم بحكيكي من بعد ما يكون الكاتب هو، خلص، هيدا نصه و موافق عليه، و هيك، مم بجي أنا بقتح إشيا، ممكن

لاقيه إنو، هون، هالكلمة عم تتكرر بالصفحة كذا مرة، شو رأيك نحط شي ثاني، هيك، هيك إشي، الفكرة هون فيها تناقد مع الفكرة الثانية، منصح هالاشيا، بيرجع بيروح عند سارة تتصح لغويًا، لأنها بس بتشتغل على الناحية اللغوية، بس كمان بحب فترة الديزاين، لما بيكونوا، لأنو كثير منشغل مع بعض يعني، بيروح وبيجي النص كثير، بيروحوا وبيجوا الصور كثير، هلق عم نشغل على كتاب ميم، عن تاريخ أدب الأطفال العربي، فالكتاب كثير مصوّر، هو ترجمة، يعني هو عن العربي، بس مكتوب بالفرنسي، فمثلاً عملية الترجمة صار فيها كثير شغل مع المترجمة، ميم، عملت أول درافت هي، أول خرطوش كامل، وبعدين بلشنا نشغل أنا وياها سوا على المعنى الدقيق، المفردة اللي مفترض ترداتها، هالاشيا، وصلنا لنص نهائي، أكيد، بعنتاه على التصحيح، و--لغويًا، عند سارة، وبعدين هلق عم نشغل الديزاين، صار خالص ف، يعني، تنقاية الصور، ميم، تعملي أندكس [index]، ميم، فهرس بالأسماء، أو هيك شي، هول الإشي مراحل كثير حلوة، وبعدين كثير بحب روح عالمطبعة، تابع مع ال--، المرحلة ما كثير بتح--، يعني ما كثير هوايتي هي مرحلة البيع، إنو يمكن بيعد الكتاب ما بيعود بيتحرك إذا ما هيك، بضغط عحالي

س.ش.: ميم، أو كيه ميم، حابة إرجع شوي للسنة اللي تأسست فيها الدار 2014، فحابة إسأل شوي عن إنو شو كانت الظروف بيبيروت بيهذاك الوقت، شو--، وين كنتوا عم تشتغلوا عالدار، ميم، و شو كان الحي شكله، محل ما كنتوا عم تشتغلوا؟

ه.ب.: [00:39:00] كنا بعين المريسة، ميم، كنا بعين المريسة، بمكتب، منه مكتبة، يعني مكتب بقلب بناية، مكتب أكبر من هون، و كان--، كانوا يخبرونا، بالزمنات كانت عين المريسة خط تماس، يعني شوي، قريبة من خط هيك، مش هين إنك تنزلي لهونيك، فيخبرونا اصحابنا ببعدين إنو، واحد رفيقي بيخبرني، إنو هيدا كان بيت وحدة إسماها إم وليد، كان بيت دعارة، هو ذاته المكتب، حبيت كثير الفكرة، كنا عما نطلع كتاب، كنا عم نشغل عكتاب رسول العلي، تبع فؤاد حبيش، إنو يطلع كتاب رسول العلي، يلي أساساً هو النسخة الأساسية كائنة طالعة بال 1930، يعني بإيام كانت هينة إنو يكون في عندك بردلات [bordels]، ومدري شو، بيبيروت، ميم، بفترتها لما بلشنا بعين المريسة، يعني، كيف كانت بيروت، هلق لما عم تسأليني هالسؤال تذكرت كم إنفجار، عشناهن بوقتها، مثل إنفجار كان على--، يعني بتذكر وقتها تلفنولي عدة ناس يسألوني إذا كنت بالمكتب وقت الإنفجار تبع، إنفجار كان صوب ستاركو [starco] يمكن هيك شي، ما بعرف شخص مات فيه، سياسي، ما بتذكر مين، وما بدي إنذكر هلق، ميم، إيه، كانت فترة إنفجارات متكررة، وكذا مرة حدا قلي إنو ليش قاعدين على عين المريسة؟، منطقة عم يتكرر فيها--، يعني خطرة، ميم، أنا كنت شوف فيها منطقة بنزل فيها عالبحر دغري، بروح بكزدر، ما كنت، كيف كانت حالة لبنان، ما كانت أكيد مثل هلق، ميم، يعني، بس كانت بالمرحلة يلي بتبينك إنك رح توصلي لهون، يعني 2013-2014 كنا واضح إنا آخدين مفرق غلط عالآخر، ما بدي قول غلط، خليني قول، قاشط، مدهور عالآخر شو بدي--، ما بعرف شو بدي قللك

س.ش.: [تضحك]

ه.ب.: [00:41:29] كنا بمفرق غريب عجيب، ووصلنا لهون، بس كانت مبينة، إنو، بتعرفي كان هالشي يلي في هيك، مثل الغلاساج [glacage]، بخليكي ما تشوفي الشئ اللي ورا، الواجهة، واجهة إنو الدولار ثابت عال 1500، واجهة، بس إنو كلايته كذب كان، يعني، بتذكر مرة حدا بتونس عم يطلب مني، إنو، لازم ياخذوا كتبنا، إنو مثلاً الكتاب تنقول هون حقه 20\$، لازم هني ياخذوه ب2\$، لأنو هني عندهن كريزا، إتطلع أنا، إنو نحن ما مبينة عنا الكريزة، بس أكثر من موجودة، يعني ال20\$، كان قيمتهن مثل قيمة اليوم، الدولار، بس ما كان مبين، ما كان معلن، كان في هالشي ال، اللي منحت تحت السجادة الزبالة هيك، إيه، فكان هيدا الشئ كثير بتحسي فيه، بس ما كان طالع بعد لبرا، هيدا، هيدا إنطباعي عن هاي الفترة

س.ش.: ميم، ميم، حكيينا شوي عن إنو التحديات اللي بتواجه النشر، وإنو توزيع الكتاب، و هيك، بس في شي ثاني بتحبي ترديده عن إنو شو يلي عم بوقف بوج النشر، وإنتاج الكتب و هيك؟

ه.ب.: [00:42:57] ميم، ليكي أهم شي أنا برأيي هو راحة البال، ميم، أكيد في قصة إنو الواحد يكون عنده مقدرة الشراية، أكيد في ثقافة القراءة ترجع، أو تجي، ما بعرف، شو بدنا نقول، يعني ما بهم، ميم، بس، طالما ما في راحة بال، أساساً الكتاب مش عم يعرفوا يظهروا، مش، ماء، مش، ما بدي عمم، بس إنو صعوبة على الكاتب بصورة عامة إنو يطلع من إطار المكان يلي هو فيه، تي عمل الإبداع اللي هو بيقدري عمله، يعني هلق، مثلاً، مين رح يقدر هالسنة حدا يكتب، خلينا نقول رواية عاطفية، مين؟ مين رح يكتب رواية بوليسية؟، مين رح يكتب رواية إجتماعية؟ إجتماعية رح تكون حوالي شو رح تكون؟، يعني، هيدا عم بحكيكي عن الرواية، ميم، طالما ما عندك نفسية مرتاحة، مش رح تقدري لا تطلعي كتاب هيك، حرّ، ولا رح تقدري تقري كتاب من أوله لآخره، ميم، ببعدين في، في دعم إنو ال، الكتاب من الحلقات الضعيفة، الثقافة بصورة عامة، الحلقات ضعيفة، هلق الثقافة البصرية والسومية أسهل شوي، لأنها ممكن إنها تنطلب مجهود أخف، يعني، مثلاً، بتحضري فيلم بتحضريه بساعتين وخلص، الرواية بدوها وقت أكثر، الكتاب البحثي بدو وقت أكثر، الغنية بتسمعيها بدقيقتين وخلصنا، فالكتاب بدو بيئة، هالبيئة بتأمنها، بداية، أول شي، لازم يكون في

وزارة، وزارة ثقافة بتشتغل فيها، نحن عنا، ماعنا هالشي، يعني، إنو، من زمان و جاي، وزارة الثقافة على هامش، اللي ببصير، صار في حالات معينة من وزراء عملوا شي محدد، معين، للكتاب، بس ما فيكي تقارني بشو ببصير بغير بلدان، يعني، ممم، بعدين نحن مرتبطين بهالعالم العربي، ممم، إرتباط بيعطيك غنى كثير، بس بنفس الوقت بفقر كثير، ممم هلق عمقول شي يمكن، يعني، حتى أنا ما--، ممي--، عم بحكيكي بدون ما كون فكرت كثير باللي عم قوله ف، مش بالضروري اللي عم قوله يكون 100% مقتنعة فيه، بس، بمعنى إنو نحن مرتبطين لغويأ ب، ممم، لما تكون بلد صغير هلق، إنو، ويكون المنيموم [minimum] لحتالي كتاب يكون إلو إنتاجه مجدي مادياً، يعني، لحتالي تقدري تطلعي غيره، لحتالي تقدري تعيشي منه، ما فيكي ببلد 3-4 ملايين شخص، تباعي 1000 نسخة بالهين، و تحت ال1000 نسخة ما فيكي عملي، هلق رح يصير فيكي عملي ديجيتل [digital]، بس إنو ما نفس الشئ، يعني، ما نفس الشئ، بكفي لأنو لما تكوني عم تباعي بس ال200 نسخة، طب هيدي هال-هالكاتب كيف بدو يعيش تيقدر يعمل كتاب ثاني و ثالث، فمشان هيك نحن عنا هالشي اللي هو حلقة شوي مفرغة بين الكتاب اللي عم يخلق بلبنان بالفصحى، لأنو بلبنان في كثير ناس بتحب الفصحى، و معودة عليه-- عليها و هيك، بس كمان لأنو لازم الكتاب يروح على البلدان العربية، و بين إنو هالبلدان العربية مش هالقد بقي عم تاخذ الكتاب اللباني، و أساساً، إذا بتروحي على عدة بلدان عربية، مش هالقد عم يقرأوا عربي، صارو اللي قادرين عم يقرأوا إنكليزي أكثر من ما عم يقرأوا عربي، تاريخياً، بتشوفي إنو هالبلدان اللي فيها ممم، ممم، فيها الدكتاتورية، لبيبا، العراق، كانوا هالدكتاتورية اللي كانوا فيها، يعني كانوا أذ شوي من دكتاتورياتنا اللي ما إسمهن دكتاتورية، فكانوا يشتروا من كل كتاب بيطلع، جديد، يشتروا 200-300-400 نسخة، يوزعون على مكاتبهم، المكتبات العامة، هيدا الشئ، هالعملية الصغيرة، [00:47:57] كان بدفعلك طباعة الكتاب، أنقذتي الكتاب، بهالأول بيعة، بعده شي إنه طالع، فصار عندك إمكانية عملي طبعة ثانية، طبعة ثانية بتربحك أكثر بكثير، هلق صار، كثير صعبة عملي طبعة ثانية، أكيد عم بحكيكي ع-على سعيد أنا، كدار نشر صغيرة، و منعمل كتب، ممم، يعني مش إنو روايات، ممم، يعني إنو بكميات أو شي، فأكيد، دور نشر كبيرة موضوعها مختلف، بس عم احكيكي عن صغار، ممم، يلي هني إيه، إذا ما عندك حدا يدعمهن بشرايات مهمة، كثير عندهن صعوبة إنهن يعملوا الكتاب الثاني و الثالث فمشان هيك، بتلاقي كثير منهن عم يسكروا، يعني هالكلم سنة في كذا دار سكروا، اتصلت بكم حدا قلهن يلا فتحنا مكتبة لحتالي تجيبولنا-- "أه سكرنا نحن". هلق، في منهن قال "إيه منجيب الستوك [stock]"، بس إنو، ما بقي رح يطلعوا، ما بقي في عندهن هالمشروع، ما بقي يقدرنا

س.ش.: ممم، ذكرتيني كنت، أول ما كنت عم فكر بالمشروع، مشروع التاريخ الشفوي، كنت كثير عم فكر بثانية إنو شو هو ال- شو هي دار النشر الساندة، و شو هي دار النشر البديلة أكثر، ف، بس بعدين بلشت إنو، فكر، إنو هاي الثانية يمكن ما كثير بتوصف الوضع هون، فحابة أعرف شو رأيك عن إنو، هالشي، لأنو، خصوصي إنو ذكرتي دور النشر الكبيرة كيف وضعها عم يختلف عن دور النشر الصغيرة

ه.ب.: [00:49:30] ممم، أكيد في ثنائية، ممم، ما يعرف لأ، ما أكيد، لأنو هي ثنائية عندك تنين، يمكن عندك أكثر من تنين، ما يعرف، بس عندك إختلاف كثير كبير، كثير، بين ممم، ناس عم بتكتكو على كتاب لأنو عاجبهن إنهن يعملوه، وناس، ممم، إجاهن نص، إتفقوا مع الكاتب على مشروع النشر، قالوله "راجعتة منيح؟"، قلهن "إيه" و طبعوه، ممم، بأول شي، مثلاً، أعطيك أنا، ممم، و هيدي ما دخل كبير و صغير، في دور نشر كبيرة بتعمل 600 مراجعة على الكتاب، إنو، و في دور نشر صغيرة ما بتعمل ولا مراجعة، و مشان هيك ما-ما-ما بحسها هي كبيرة و صغيرة، ممم، بس في مثلاً، نحن هون طريقة شغلنا بتكلفنا مصاري كثير، يعني نحن، أنا الكتاب بكلفني إذا بدك تاخدي كتاب واحد عندي، و كتاب واحد عند دار نشر ممم، يعني مستني منيح، قاعدة منيح، و مظلمة حالها و هيك، بتكون مثلاً نسخة بتكلفني عشرة آلاف ليرة، بتكلفهن إلهن ألف ليرة، أول شي لأنو يكون عندهن موظفين، أنا ما عندي موظفين، كله فري لانس [free-lance]، يكون عندهن موظفين، هالموظف بيقدر يشتغل هالكاتب، ولما حدا غيره عم تراجع فيه شي، بيشتغل على كتاب ثاني، هاي، هاي شغلته، ممم، الشغلته الثانية، هي إنو يكون عندهن ستوك قديم، عم يرجعوا بيشتغلوا فيه ت--، يعني، في عندهن عدة، عندهن قديم بغذي الجديد، عندهن هالإشيا اللي بتساعد، ممم، أنا فوق كل شي إنو بعمل، يعني عنا نحن شي 3-4 أشخاص بيعيدو قراءة النسخة النهائية، هيدا كلو وقت، و مع هيك، بضل عندي أغلاط، يعني، ما يعرف كيف الواحد بيقدر يعمل لحتالي بيطل عنده أغلاط نهائياً، ممم، بس بضل في أخطاء كثير صعبة، إنو، و مش يابا عندي، عندي أخطاء، و عند غيري ما في، إنو عم شوف كتب غيري، و عم شوف قديمه ملان أخطاء، ممم، بس، ممم، يعني، كل شخص بده تراجع القرية، هيدا كلاياته وقت و مصاري، عم تدفعيله، فإيه، ممم، في فرق، أكيد

س.ش.: ممم حابة إرجع شوي للمعرض اللي اشتركتي فيه عن النشر البديل اللي صار ببيروت و بعمان، فكنت عم فكر إنو شو هي هاي العلاقة اللي عم تصير بين بيروت و عمان، إذا في، و كمان حابة أعرف شو رح يصير بالمسرد يلي شاركتي فيه بالمعرض، إذا حيصير كتاب أو حينطبع، ينشر بشكل معين؟

ه.ب.: [00:52:30] هلوق هو هيدا المسرد صدفة صار، أنا كان مشروعى ما إنو، ممم، أساساً منه فنى مشروعى أبداً، مم المسرد عملته أنا و عم بعمل بحثى لحتالى إقدر أنا إفهم مين مين؟، كنت ضيع بين أسامى دور النشر، كنت ضيع بين قرابيين بعض، كل واحد عنده دار مختلفة، بس نفس الإسم مرات، و هيك، تزبطهن زمنياً، تزبطن، و بعدين كنت بحاجة إني أعرف، طيب، هي و عم تطلع هالدار النشر، شو كان فى جمعيات، أو نوادى قرّاء، أو هيك شى، شو كان فى حياة ثقافية، شو كان فى صحافة، شو كان فى...، فصرت أعمل، كل ما يطلع معى، ممم، مادة، معلومة، حطها على، ممم، رزنامة، هالرزنامة تعبت، فإستعملتها بإطروحتى، بوقتها، يعنى كفضل، ممم، ما كانت فصل، فصل ك، ك، ما كانت فصل دراسى، كان بس مثل ما بتقولى، مثل كيف عندك فهرس بأخر الكتاب، كان عندي ببداية الكتاب هالرزنامة لتساعد أى قارئ يفهم، يرجعها، وبالأخر إتضحلي إنو هي مش بس تتساعد، إنو صحيح أنا كنت بحاجة لإلها، بس كثير ناس بحاجة لإلها، لإلها لأنو هالمعلومات ما منعرفهن بقى، ممم، هلوق من بعد كم سنة، ساقبت هنى هالصبايا إجو، يلي هنى مهى مئمون، وآلاء بونس، يعنى، مصر و الأردن، كان عندهن هالمشروع ببيروت، كانوا عم يحكونى كتارىخ نشر، بدهن يسألونى إشيا عن تاريخ النشر، و ما يعرف شو كانوا عم يكتبوا بالظبط، بس بتذكر إني قللتهم منى قدرانى، لأنى عم بشتغل على هالمشروع، و كنت عملته على رولو ورق طويل، يعنى مثل السجادة ملفوف، و هيك، و كنت حابة كمل بهالطريقة، هنى عجبتهن فكرة، و أصرو إنهن يدخلوه بالمعرض، فوقف الشغل بوقتها، جمدهت بأرضه، تينعمل منه شى فنى، أنا كانت فكرتى بوقتها إني أعمل ممم، مسرد، ينطبع أكيد، و يتشر كمسرد، بس يكون معين لمشروعى الثانى اللى هو مشروع كتاب عن ورق بيروت، هو إسمو المشروع ورق بيروت، يلي هو عن حركة النشر و الطباعة و الصحافة ببيروت، بأواسط القرن الماضى، يعنى، تقريباً، ممم، إيه، هيك، قبلش هيدا، بعدين تحوّل، جنى طرابلسى، و فيليبيا دحروج، و جورج حتّاء، حولوه لمسرد فنى، و إنعرض بالمعرض، هلوق، من بعد بيروت آرت سنتر [Beirut Art Center] راح على عمّان، عالاردن، يمكن هو هونيك بعده هلوق، و فى كمان راح على دى بيتهيللى، عالامارات راح، نفس المعرض، مش بس المسرد، كل المعرض، النشر البديل وال--، ف، إيه هو بالنسبة لألى، هو بس المسرد معين ليقدر الواحد يعمل هالدراسة النقدية أو بالأحرى الوصفية، لأن بذك تعملى الوصفى قبل ما تعملى النقدي، أو التحليلى، ما بدنا نقول نقدي، تحليلى، فأنا بمرحلة إنو بدي كمل مشروع بلش من فترة، و لازم، يعنى، لازم خلصه، و هو مشروع وصفى لحركة النشر بخلال قرن، ببيروت و المسرد معين لأله

س.ش.: اها، سو هلوق رح تشتغلى عليهم لتخلصى المسرد مع ال--؟

ه.ب.: [00:56:46] هلوق المسرد، بالوقت الحالى، بحالته الموجودة، هو منه كامل، أكيد، بحباته ما يكون كامل هيك شى، بس بمعنى إنو عندي مجموعة معلومات ما داخله عليه، مش إنو بدي فتش بعد، بغض النظر عن التفيتش اللى لازم أعمله بعد، أو الإشيا اللى رح تطلعلى بالصدفة بعدين، بس أنا هلوق عندي معلومات، يعنى مثلاً تواريخ لخلق دار، لما يعرف، أنا، ل، لتسكير مطبعة، لدخول نوع طباعة جديدة، ممم، ل، ممم، صدور شى مميز، صحفياً أو، أو كتيباً، لإصدار قانون معين بيتعلق بالنشر و الطباعة ل، ممم، نوع من شراكة بين بلدين مختلفين أو ب، بمجال النشر، ممم، إيه، فهيدا الشى إنو، هلوق إيمنى بالظبط، ما يعرف، إنو بالأخص هلوق، هالفترة، كل شى شوي من هالنوع مجمدهت، يعنى، منى، يعنى منى حاطة ولا أى تاريخ ولا أى شى بالوقت الحاضر

س.ش.: ممم، فى سؤال ما يعرف ليش نسيت إساله قبل، بس مثلاً إذا عندك يوم عم تشتغلى فى على كذا شى، و منهن شى خصه بكتاب عم تنشره، فشو يكون شكل هاليوم، أو الروتين يلي بتتبعيه بهاليوم؟

ه.ب.: [00:58:30] يعنى قصدك إذا عم بشتغل على كتاب، ما بقدر إشتغل على كتاب أنا و عم بشتغل على إشيا تانية، يعنى، لازم كون مثلاً اليوم، عارفة حالى إنو أنا بكرا هيدا النهار لألى، يعنى لألى بمعنى لوحدي فيه، وبدي إقعد إشتغل على قراية كتاب، مراجعة كتاب، تصحيح كتاب، وبدي كون ولو يمكن إشتغل بس 3 ساعات بالنهار على هالمشروع، بس بدي كون ما عندي أى موعد تانى، لأى مشروع تانى، إنو خلص، هيدا نهار مكرس، إلا بحالة، بحالة عم نشتغل على الديزايين، يعنى، مع ناس تانيين، لما عم بشتغل مع ناس تانيين، نهاري رح يكون، ممكن يكون يوم بالمكتبة مثلاً، كل النهار، و عشية الساعة 5:00 بظهر من هون، بروح على إجتماع كرمال نشتغل على الديزايين، فبكون موعد مثل أى موعد تانى، ما بكون هالقد بحاجة إني كون مركزة و، و كون مركزة فيه، بس طالما منى عم غير شى بالنص، عم نشتغل على الصور، عم نشتغل على الهوامش، عم نشتغل على الخطوط، عالألوان، ماشى.

س.ش.: ممم، حكينا نحن شوي عن إنو السياق السياسى يلي كان عم يصير من ال 2014 لهلوق، بس حابة أعرف أكثر شوي إذا فى، أصلاً، إنو، أو إنت إذا بتشوفيهن سياقات إلها علاقة بالشغل اللى بتشتغلى فيه، إنو هنى سياقات تاريخية، أو إجتماعية، أو مثلاً إمتدادات لشغلك، يا أما من قبل، يا أما لبعدين، تشوفيهما إنو عم تطور

ه.ب.: [01:00:12] ما كثير فهمت سواك

س.ش.: إنوحابة أعرف شو هو السياق يلي إنتي بتحبي تحطي شغلك فيه، أو يلي بتشوفي إنو شغلك جزء من تاريخ معين أو ثقافة معينة أو هيك

ه.ب.: [01:00:29] ممم، أوفف، ليكي يمكن أنا من جماعة النوستالجيا [nostalgia]، ممم، فترة ما قبل، فترة الخمسينات، بتجذبني كثير، و ما قبل، عم بحكيكي لحد أوائل الستينات، يعني أنا بعد الستينات فترة ما كثير، ما بهتم فيها أساسا كشغل، يعني، إلاب شو كان، يعني، شو كان البكرة تبع هالناس اللي كانوا عابشرين بالخمسينات والأربعينات، وهيك، وشغلهم وين راح بالستينات، ممم، يعني، لما بمتد للستين، ممكن اوصل لآخرها، بس ما بشتغل بالسبعينات، ولأنو [؟؟؟عندي؟؟؟] كمان--، مش بس لأنني ما بحب هالفترة، كمان لأنو عندي إنطباع إنو هي فترة السبعينات يلي هي كان صار فيها الأوفسيت [off-set]، صار فيها الفوتوكوبي [photo-copy]، كان فترة النشر عم يتغير فيها، والثمانينات بلبنان، كمان كانت فترة النشر تغير فيها كثير، ممم، كانت فترة غزارة بالنشر، ممم، فترة مختلفة، يعني ما إشتغلها أنا زيادة، ما تحشرت فيها، وإختلاف بنوعية الشغل، مشان هيك كان، خف إهتمامي يعني، إهتمامي أنا هو هالتاريخ، يعني الفترة اللي إشتغلنا فيها أساسا--، أنا كان إهتمامي الأول بدي إشتغل على، من ال1920 لل1960، يعني فترة الإنتداب وما بعده، تاشتغل هالفترة، إكتشفت إنو ما بقدر أعمل هالشي غير ما أعرف كل اللي كان صابر قبل، لهيك أنا رجعت للألف وخمسينات، ممم، هين ترجعي للألف وخمسينات بتاريخ الكتاب العربي لأنو، ممم، أول شي لأن في كثير ناس عاملين أبحاث بهالموضوع، يعني في عندك نتاج ترجعيله، ولأنو ما كان هالقد في هيدك الغزارة يابا، فمحصورة، بالأخص إنو مني عم بعمل فيها بحث بشكل إني إكتشف إشي جديدة، إنو، مش، مش مجالي، ف، بش عشتها بشكل إنو، يعني، كمان بهواها مثل ما بهوى القرن ال20، وركزت على النصف الأول من القرن ال20، وهيدا هو الفترة يلي، أساسا، مثلا هالكتابين يلي عم قلك أنا عدت طلعتهن، مثلا، رسول العلي، والرسوم، وكمان ماشية بهال--، بدي كمل بهالمجال، وبلي هو إعادة نشر إشي مفقودة، إشي نادرة، وفيها شي مميز، من قديم وجاي، عندي مشروعين ثلاثة بهالمجال يعني بعد جايين إنشالله

س.ش.: ممم، أوكيه، صراحة هي كانت كل أسئلتي، بس حابة إنسلك إذا في شي بتحبي تزيديه عالمقابلة؟

ه.ب.: [01:03:50] ممم، لأ، لأ، يمكن قلنا كل شي

س.ش.: شكرا كثير

ه.ب.: [01:03:56] لأ، شكرا إلك، الأسئلة حلوة، وهيك بتعطي أفكار يعني

س.ش.: thank you!

[نهاية المقابلة]